

Segun Evelyn Wever-Croes

Urirama ta malo pa medio ambiente y pa habitantenan

DURANTE e reunion den Staten tocante e parke di molina di Urirama, lider di MEP a trece varios punto padilanti.

Energia limpi: nos partido ta na favor di energia limpi. Pero e proyecto aki ta trece cune cu mester inverti den un gran cantidad

di bacteria pa backup. Henter un veld di futbol, segun expertonan a splica nos, pa asina por duna backup ora biento cay. E baterianan aki ta contene material kimico cu ta nada bon pa nos medio ambiente. Ye baterianan aki ta duna coriente solamente pa algun minuut, mientras WEB ta lanta su sistema bek.

Pues na WEB semper mester tin motornan ta draai riba diesel pa por lanta na momento cu biento cay. Makinaria cu ta paga ora tin biento y cu mester cende ora biento cay. Y ta parce mi cu si bo ta cende paga un mashin, e no ta wanta hopi. Mescos cu si bo ta cende paga un auto cada rato, e no ta wanta hopi,

y lo costa bo mucho mas.

MER-rapport y conseho di comision independiente: e rapport cu fraccion di AVP a laga traha y cu a costa 30 mil florin, ta confirma nos preocupacion. Nan a bisa claramente riba e pregunta cu si e molinanan ta causa daño na salud di hende

“wij sluiten het niet uit”. Pues, nan no ta exclui e riesgo ey, nan no por duna garantia cu e molinanan ta completamente safe. Y pa colmo e solucionnan cu nan a propone ta pa nan pone airco den full e cas, pero ken ta paga e ora? Of nan a bisa pa cambia e camber di drumi pone banda pazuid. Aki na Aruba pazuid nos ta pone e cushina of otro cos, pasobra cambernan di drumi ta pariba of pa nort.

Aruba ta un comunidad chikito. Un comunidad den cual nos tur kier lo miho pa nos isla. Ban haci hunto, ban ta un ehempel pa resto di mundo. Laga nos demostra mundo henter cu e cambianan cu no kier mira riba nos pais ta bin di paden. Nos no mester laga nos mes wordo influencia pa desaroyonan internacional of companianan grandi internacional cu unico cos cu nan kier ta gana mas placa, sacrificando sernan humano.

Companianan di afo cu no conoce e importancia di e luga cu yama Alto Vista! No! Aruba ta un pueblo cu hopi amor pa su prohimo. Ban muestra respet pa nos prohimo, y no ban pone salud di hende na riesgo. E dicho ta bisa tin otro camindanan cu ta yega na Roma, y den e caso aki, tin otro camindanan pa yega na un Aruba cu energia limpi y na mes momento baha nos gastonan di awa y coriente. Otro camindanan cu no ta pone salud di hende na riesgo. WEB tin un vision. Ban laga nos expertonan guia nos den esaki. Ban evalua e proyecto na Vader Piet. Ban atende cu habitantenan cu ta sufriendo consecucionan di salud di e molinanan aki. Ban experimenta cu energia solar. Y ban laga WEB haci e inversionnan realistico pa nos yega na un WEB sostenibel y reduciendo gastonan di produccion. Tin suficiente otro alternativa, pero ta determinacion y disponibilidad politico mester tin. Ban muestra cu nos sa con pa pone bienestar di salud di nos famianan di nos muchanan inocente na prome luga. Bo no mester ta un mama ni un tata pa tuma decisionnan responsabel. Bo mester simplemente di tin curason pa bo pueblo.